

DOROTEA E NICOLAUS DA FLÜE
LUR VITA E LUR OUVRA

Rav dr Paul Bernhard Rothen

LA VITA

Nicolaus da Flüe es nat als 21 marz 1417. El deriva d'una famiglia da paurs benestants da Sachseln in Sursilvania. Diversas testimonianzas da contemporans ans muossan ün purtret precis da sia personalità e da sias staziuns da vita, il prüm dal paur e davo dal eremit.

Davo las nozzas cun Dorotea Wyss bainquant plü giuvna, da l'otra riva dal lai da Sarnen as fabrichan els in vicinanza da la chasa dals genituors üna chasa nouva per la giuvna famiglia. Infra vainch ons naschan desch uffants. Nicolaus viva culs plaschairs e culs schaschins d'un paur. Sco cussglier vegn el a cugnuoscher l'art e las intrigas da la politica. Il cumün ha fiduzcha in el. Alch temp è'l fatschendà cun ün process dal cumün cunter il spiritual dal lö. In guerras s'intermetta'l per cha las truppas as cumpordan cun disciplina. Cun attenzion registrescha'l las consequenzas discrepantas per la Confederaziun cha'l bainstar davo las guerras cunter la Burgogna e cha las intrigas da speculants infams portan cun sai.

Als 16 october 1467 - a l'età da 50 ons - banduna'l duonna ed uffants. Per chasa e pauraria esa bain pisserà. Iis figls plü vegls surpiglian sainz'oter l'economia. La famiglia nu vegn in bsögn. E listess sto'l cumgià esser stat dür. Davo lungas cumbattas suna gnüts a la persvaziun chi'd es "la volontà da Dieu". Seis ultims dis da vita voul Nicolaus passantar be cun Dieu sulet süllas vias europeanas da pelegrinadi.

Ma i vegn oter. Ün pér dis davo seis cumgià, cuort avant Liestal, vezza'l la cità sco in flommas. Esa üna visiun? Nicolaus es spaventà. Ün paur til fa discuorrer. I discuorran eir da seis pelegrinadi. Nicolaus vegn adüna plü malsgür. Il prüm uman ch'el inscuntra daspö sia partenza til dà brüscamaing il cussagl da tuornar a chasa: El nu dess viver a l'ester ed a charg dad oters umans; ils Svizzers nu sajan insomma nüglia fich bainvis. Tuot confus as metta Nicolaus a durmir suot ün frus-cher. Dürant la not til para be sco scha sia böglia til gniss tagliada our dal corp. Manà d'un man

superior tuorna'l in sia patria. Eivnas plü tard chatta'l seis pos aint il Ranft, illa vallada stretta da la Melchaa, pac toc davent da sia chasa paterna. El es uossa sgür cha quai saja il lö ingio ch'el dess star.

Bainbod as derasa la nouva cha l'eremit nu mangia inguotta. Uffizis dal stadi e da la baselgia examineschan quai. Adüna darcheu vegnan buondrius chi voulan verer "il sonch vivaint". Nicolaus svess respuonda las dumondas buondriusas sch'el nu mangia propri inguotta, be cun "Dieu sà". Finalmaing s'es persvas: Il "miracul dal gegün" es realità. Il bain scolà abat Johannes Trithemius scriva dal 1511: "Eu sà e nu dubitesch: las generaziuns futuras saran schmortas. Divers dscharan cha nus schmanzögnain. Oter dscharan cha nus sajan ignorants. Ma nus nu schmanzögnain ni eschan nus ignorants scha nus pigliain quista chosa sco fat istoric."

Uossa fabrichan ils convaschins üna clausura ed üna chapella per "frar Clà". Schurmas da visitaduors van pro el aint il Ranft. Umans in bsögn tscherchan cuffort e cussagl pro el. Cussgliers federrals til consulteschan. Instanzas da baselgia til dumondan per intermediaziun.

In december 1481, cur cha'l conflict tanter citads e lous da pajais dvainta vieplü privlus illa Confederaziun, intermediescha el üna pasch chi tegna sur generaziuns.

Als 21 marz 1487, il di da seis 70-avel anniversari, moura Nicolaus da Flüe davo lunga cumbatta dolurusa. El vegn sepuli illa baselgia parochiala da Sachseln.

Ma Petrus dschet:

Guarda, nus vain bandunà tuot quai cha nus avaivan e t'avain seguità. Ma el als replichet: Eu as di in vardà: I nun ais ingün chi ha bandunà chasa, duonna, fradgliuns, genituors o uffants per amur da l'evangeli, chi nu gniss ad artschaiver in quaist temp preschaint bleras voutas ed in il muond chi ha da gnir la vita eterna.

Lucas 18, 28-30

IL MUOND SPIERTAL

Frar Clà nu sà ni leger ni scriver. Sia vita spirituala vegn fuormada da quai cha seis spirituals til han dat inavant, da la pratcha pietusa da seis temp e da visiuns e segns chi til muossan la via interna in mumaints decisivs.

Fingià bod til turminta üna insolita inquietezza spirituala. El tschercha "il esser uni". El gegüna ed as approfuondischa ill'urazchun. Precautamaing tscherna el ils sacerdots, als quals el s'affida. Dad els as lascha'l manar. Heimo Amgrund til muossa "la meditaziun da la paschiun da Cristus": i'l ritmus dals temps d'urazchun tradizunals ha el part a las suffrentschas cha Gesu vaiva pati sün sia via vers la crusch. Di per di va'l internamaing süllas staziuns da la paschiun da Cristus:

vespras (a las 18): Soncha Tschaina

cumplet (a las 22): Munt dals olivers


matutin (a las 00): Da Gesu vain fat schnöss
davant Cajafas

prim (a las 6): Gesu vain surdat a Pilatus ed
a Herodes

terz (a las 9): Gesu vain giaschlià e curunà
cun spinas

sext (a las 12): Crucificaziun

non (a las 15): Mort.



Meis Segner, meis Dieu,
dà tuot a mai
quai chi maina pro tai.

Meis Segner, meis Dieu,
quai piglia da mai
chi'm separa da tai.

Meis Segner, meis Dieu,
o pigl'a mai
e fa cha sia be da tai.

Urazchun da frar Clà

IL PURTRET DA MEDITAZIUN

Seis "cudesch" da meditaziun es ün simpel disegn. Cun ün pér strichs voul quel muossar via sulla perfecziun da Dieu. Trais razs mainan our dal "ün" e trais razs tuornan inavo aint ill'unità. Ün incuntschaint contemporan quinta co ch'el fa visita al frar Clà aint il Ranft e co cha quel til declera la simbolica dal purtret:

"Vezzast tü quista figüra? Uschè es l'esser divin. Il punct central es Dieu. In quel s'allegran tuot ils sonchs. Ils trais pizs chi mainan pro'l centrum dal rinch immez sun las trais persunas. Ellas sortan da l'unic Dieu e cumpigliant il tschêl ed il muond inter ch'ellas redschian. E co ch'ellas sortan da la pussanza divina, uschè mainan elllas eir darcheu inavo e toccan insembel in etern."

Cun meditar quist disegn as po rivar in dumondas profuondas: Co es Dieu, il Bap, il Figl ed il Spiert Sonch in sai svess ün ed unic? Co po'l gnir our da sai svess sainza gnir divis - e che tuorna inavo in el? Che fa il perfet amo plü perfet?

LAS VISIONS

Frar Clà vegn eir manà tras visiuns. Heinrich Wölflin rapporta da quellas intuorn l'on 1501. Tanter oter descriva'l il seguaint evenimaint: "Una jada gaiava el sulla prada a verer davo il muvel. Tenor seis möd s'ha el tschantà sul terrain e cumanzà dad urar dal fuond da seis cour e da's dar via a meditaziuns celestialas. Dandettamaing ha'l vis a crescher our da si'aigna bocca üna gilgia alba cun üna savur müravgliusa. Quella es creschüda sü fin pro'l tschêl. Cur cha cuort davo il muvel (dal qual tuot la famiglia vivaiva) es passà speravia, schi ha'l sbassà seis sguard per ün mumaint, ed el ha contemplà ün chavagl specialmaing bel. Lura ha'l vis co cha la gilgia our da sia bocca s'ha inclinada vers quist chavagl. E passand speravia, tilla ha maglià il chavagl."

*our da: Heinrich Wölflin, Vita dals beats,
intuorn 1501*

Una tensiun fundamentala da la vita umana dvainta purtret: Il desideri per il tschêl (la gilgia) vegn maglià dals giavüschs materials. Il chavagl chi svaglia la superbgia e l'algrezcha da seis possessur maglia la flur chi crescha vers il tschêl.

Las visiuns da frar Clà tematiseschan adüna darcheu quista discrepanza: L'uman es ester in quist muond, adonta cha uschè bler til lia aquia. Sia patria eterna es da tschella vart. Il bööt da sia brama es la funtana da la vita, es: Dieu.

Gesu ha dit:

Las vuolps han tannas e'ls utschels dal tschêl han gnieus, ma il Figl dal crastian nun ha un lö per pozzar seis cheu.

Lucas 9,58

DOROTEA

Da Dorotea Wyss savaina be pac.

Ella deriva d'üna famiglia da paurs da la spuonda nord dal lai da Sarnen. Ella parturischa tschinch figls e tschinch figlias. Descendents vivan amo hoz. Davo esser bundant 2o ons maridada è'l perincletta cha seis hom banduna la famiglia e tschercha sco pelegrin la cumünanza perfetta cun Dieu.

Il dret ecclesiastic, vi dal qual Nicolaus da Flüe ha da's tegner, disch cler e net: "Ningün nu das-cha bandunar il let matrimonial, neir na per gnir muong o eremit, scha'l conjugal nun es perinclet." L'acconsentimaint nu das-cha gnir sforzà. Eir ün spiritual sto attestar la sincerità.

Ha Dorotea amo pudü verer cha seis figl plü giuven stübgia a Basilea ed a Paris e dvainta dal 1491 chaplan aint il Ranft e dal 1502 spiritual a Sachseln?

"Cur cha nus d'eiran its fingià la mità da la via m'ha dumandà il plavan Oswald Ysner, sch'eu less verer eir a la duonna da frar Clà ed a seis figl plü giuven. Eu n'ha dit da schi. Lura m'ha'l muossà da tschella vart da la chavorgia üna chasa sün üna bella spuonda ed ha dit: Là ha vivü frar Clà e là viva adün'amo sia duonna cun seis figl plü giuven. E seis figls plü vegls maridats nu vivan neir na grond toc davent.

El m'ha manà pro ella e pro seis figl. Eu tilla n'ha dat il man ed eir al figl e tils ha giavüschè ün bun di. Sia duonna es amo üna bella duonna suot 40 cun üna bella fatscha sainza foudas. Il prüm n'haja dumandà: Chara duonna, quants ons es frar Clà fingià davent da vus? Ella ha respus: Quist mat, meis figl, farà set ons a la festa da San Jon Battista. Cur ch'el vaiva traidesch eivnas, al di dal San Gall, m'ha frar Clà bandunada e nun es mai plü tuornà."

*Hans von Waldheim da Halle rapporta
da seis inscunter cun Dorotea da Flüe
als 26 mai 1474.*

Scodün chi fa la volontà da Dieu, quel m'ais frar e sour e mamma.

*Gesu sur da quels chi taidlan sün el. Marcus
3,35.*

SI'OUVRA POLITICA

Culla cunvegna da Stans dal 1481 tschüffa la giuvna Svizra ün nouv uorden chi tegna fin al temp da Napoleun. Il protocol da la dieta disch expressamaing: Quist nouv uorden resorta da las ponderaziuns e dals cussagls concrets, culs quals Nicolaus ha sur ons nan accumpagnà las preparaziuns e culs quals el ha salvà las trattativas illas uras decisivas. Tras quista nouva lia as poja "racoglier la fideltà, la fadia e la laver cha'l pietus frar Clà ha fat in quistas chosas".

Davo las guerras culla Burgogna (1476/77) as vaivan augmantadas las tensiuns tanter las citads ed ils lous da pajais. Soloturn e Friburg vulaivan entrar illa Confederaziun. Tras quai as sentivan ils lous da pajais imnatschats da dvantar be plü üna regiun periferica d'üna lia dominada da las citads. Las discussiuns politicas s'ha manà cun paschiun, per part eir cun tössi. Impostüt la cità da Lucerna ha però adüna darcheu tscherchà il cussagl da frar Clà.

Bleras delegaziuns sun idas aint il Ranft ed han discutà cul eremit da l'andamaint da las trattativas. Davo bunas preparaziuns s'ha a la fin previs da renovar las veglias lias. Cullas instrucziuns in merit s'han radunats ils delegats als 18 december 1481 per la dieta a Stans. Ma las veglias tensiuns han tschüf svelt darcheu il suraman. Bainbod d'eira da preverer il discapit total, e cun quai il conflict sanguinus.

Illa not süls 22 december es il ravarenda da Stans Heimo Amgrund currü aint il Ranft. Dürant ün pêr uras sto'l avair discutà intensivamaing cun frar Clà sur dals puncts in dumonda. Davo üna seguonda marcha da quatter uras tuorna'l la daman tuot exaust a Stans. Cun larmas aint ils ögls roval' ils delegats da's radunar amo üna jada e da dudir il cussagl da l'hom da Dieu. L'autorità da quel ha fat seis effet. Infra pacas uras s'ha eliminà las differenzchas e la nouva lia ha pudü gnir affirmada tras güramaing. La sunasoncha ha portà la nouva da la pasch recuperada i'l pajais. "Uschè ha Dieu dat furtüna. Per quant mal cha la chose staiva avantmezdi, schi d'eir'la davo quista nouva bler meglida e davo ün'ura dal tuot miss'in uorden." Il cronist lucernais Diebold Schilling chi d'eira svess stat preschaint a Stans, rapporta dal 1513 cun quists pleuds sur da la müdada dandetta illas trattativas.

Da pitschen insü suna bler stats insembel: cur chi d'eiran amo pitschens puobs ed eir plü tard pro las laviors paurilas ed uschiglö. Frar Clà es adüna stat ün uman modest, benign, pietus, ün uman da virtü e da vardà chi mai nun ha fat dispetta cun ningün.

*Erny Rorer da Unterwald,
ami da la giuventüna e vaschin, 1488*

Ningün da noss descendents nu das-cha dubitar. Hoz esa cumprovà publicamaing e bod la plü sgüra persvasiun da tuots Tudaïschs, cha quist eremit Nicolaus nun haja mangià inguotta ils ultims vainch ons avant sia mort. El vaiva ün sen critic chi surpassaiva per bainquant sia scolaziun. El d'eira bun dad incleger ils misteris plü profounds da la Soncha Scrittüra. Ed impli dal spiert da la profezia, ha'l bler pudü dir ouravant.

*Johannes Trithemius,
abat e scriptur umanist, 1511.*

Sia vita d'eira aint il tschêl. Ma davant sai ha'l vis cler las circumstanzas umanas. Il pled da Dieu ed il gir dal muond ha'l cugnuschü cleramaing.

*Jeremias Gotthelf (1797-1854),
ravarenda e poet*

El d'eira il grond, ma eir il tipic hom da la Sursilvania: cul san plaschair vi da la vita (ma eir culla pitschna melanconia) dal lai da Sarnen, però eir culla chavorgia chafuolla da la Melchaa. Ün natüral vital ed ün natüral dubel: quia e da tschella vart, sulla terra ed aint ill'eternità, vita reala e cretta idealia. Cun purtrets profounds ha el vis aint in sferas infinitas. E davo ha'l cun plaschair darcheu muns üna da sias bellas vachas brünas, ha'l straglià seis chavagls ed ha'l lovà il bel adgör aint in tablà.

*Heinrich Federer (1866-1928),
scriptur*

Pro el survain l'esser svizzer crûj un caracter religius, liber da mincha sentimentalità, co chi's fa in quist pajais da vegl innan democratic. In möd sever ans fa'l resentir che cha patria in sen cristian pudess significhar pel uman. Ün sonch pauril cun savur da zocca e cun mans indürits da la blera lavur.

Walter Nigg, teolog evangelic, 1946.

Scha Nicolaus es ün dals baps da la Confederaziun, schi grazcha a si'ouvrä. Sch'el füss stat be ün eremit, schi nu savessna plü nüglia dad el. Cun buna radschun han perquai ils reformatuors insisti sün sia rolla politica.

*Denis de Rougemont (1906-1985), filosof ed
autur da la legenda dramatica "Nicolas de
Flue" cun musica dad
Arthur Honegger (1892-1955)*

La plü granda pussanza morala in nos pajais svizzer.

*Giuseppe Motta (1871-1940),
cussglier federal dal 1912-1940.*

Sia intermediaziun ha preservà la Svizra da la guerra civila e cun quai forsa da seis schogliamaint. Nicolaus da Flüe es ün excellent exaimpel per l'agir politic chi nu piglia sia masüra our dal success extern, dimpersè d'ün profuond impegn religius.

Sigmund Widmer, istoriker, 1973